


Dóutour Jóusè Fallen

Uno pauro Estreno !

Remembranço Calendalo



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

Uno pauro Estreno !

À Tereset, moun Amigueto

Remembranço Calendalo

« D'ouente vèn que tant tard soueno enca la campano?
A sa maire disié l'enfant;
« Au mitan de la nue d'ouente vèn que debano
« Un tant poulit cant ?...

— « Fai nono, ma fiheto! » aqui disié la maire;
Mai l'enfant reprenié bèn lèu:
« D'ouente vèn que ma tanto e ma grand e moun paire
« An sourti tant bèu ?...

« Digo m'un pau, meireto! — Anen, fai nono, bello!
Mai l'enfant poudié pas dourmi;
Se barravo leis uei, vesié de farfantello
Dins un raive ami.

Adès, soun paire, à taulo, à la grando soupado,
Avié 'no brigo tròup parla
E de tròup bèlleï causo, à sa jouino amo abrado,
L'avié desvela,

Emé lei vièi nouvè e lei sàntei legèndo
Qu'aquéu sero eis enfant si dis,
E l'avié messo, emé lou vin cue pèr bevèndo,
Au sant paradis.

Nouvè ! que d'esperanço au jouine àgi vèn traire!...
Mai, à l'ouro de si coucha,
L'enfant avié plus souem e pèr la mena jaire
Fauguè si facha.....

« Alor,» ensin vèn mai, « es tout-aro que nèisse,
« Digo, lou bouen pichoun Jèsus ?
« E lou papa Nouvè, pèr lou vèire-parèisse
«Fau que douérmi plus ?...

« E que mi dounara ?... — Mai taiso-ti, ma fiho!
« Vòu pas que lou vegon, t'ai di!
« Douerme, que se venié, touto aquelo babiho
« Lou farié parti....

— « Voudriéu uno titè, em' un poulit meinàgi,
« Em' un pichoun mótoun tout blanc...
— « Em' un gautas, bessai ? » .. Adiéu, bèu pantaiàgi !..
Mai revèn plan-plan....

La maire s'es couchado e lou lume s'amouesso:
— « Que!.. ma !.. pèr coume de souvèt,....
« Un agneu !... tout pichoun !... li coustarié pas fouesso
« Au papa Nouvè !...

— « Douermes ?... De miejo-nue va s'acaba la messo
« E toun paire.. — Un mótoun !.. un buou !..
« Uno saumeto !... — Espèro, e ti l'aura lèu messo,
« Éu, dessus lou cuou !... »

Aqui, pèr un moumen, dins la chambro tout chuto
E 'nfin la pichouno en souscant
S'acato... Lou paire intro e bèn d'aise, à la muto,
Embrasso l'enfant ..

E... « Que ! papa Nouvè, l'as pas rescountra, paire!...
« Souto la chaminèio ai mes,
« Ve, tóutei mei soulié. — N'a proun ! » crido la maire;
« Acò 's pas permés !...

« Lei tavan que tei conte an mes dins sa cervello
« L'empacharan de plega l'uei ..
— « La fagues pas ploura, veguen !... — Si fara bello !..
— « Un jour coumo vuei!... »

E l'an jounello, aqui, si crèsent assoustado,
Vague tourna-mai de piéuta,....
Tant e tant qu'à la fin, doues fes dins la nuechado,
Si faguè fouita:

— « Lou juguet que Nouvè pouerto eis eniant pas brave,
« Ah! marrido, vai, lou veiras !
« E tant dins ta memento espèri que si grave
« Que t'en souvendras! .. »

Ensin parlè lou paire e la pauro pichouno
En plourant s'endourmè... Dourmié,
Mai avié retoumba, l'amo de la mignouno,
Dins sa ravarié,

Car un bèn dous riset sus sei labro rousenco
Espelissié de tèms en tèms
E soun senet semblavo, ei clarour proumierenco,
Enca fernissènt...

Mai lou souem pantaious noun duro! A la primo aubo.
Tre que sa maire sauto au sòu,
La pauro, souto voues, li demando sa raubo,
Tant d'aise que pòu...

E de garapachoun courre à la chaminèio...
Ai ! soun estrambord toumbè net:
L'avié, dins lei soulié qu'avié plaça la vèio,
Qu'un vièi martinet...

E restè nè, l'enfant, mai nè coumo un foundèire
E coumprenquè lèu la leiçoun:
Subran à sei parènt, qu'esperavon risèire,
Demandè perdoun...

-Au bouen papa Nouvè la repentènci agrado.
Car alor revenguè 'n pourtant
Un bèn poulit meinàgi, uno titè frisado
Em' un agnèu blanc.



Dóutour JÒUSÉ FALLEN

Uno pauro Estreno!

**Édition du « Clocher Provençal »
VILLE DIEU (Vaucluse)**

Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti souciau:

3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc - 1998

© Adoubamen dóu tèste, de la meso en pajo e de la maqueto pèr Ugueto Giély,
en sa qualita de mèmbe dóu Counsèu d'Amenistracioun dóu CIEL d'Oc.